

Fasnacht 2020

Blagèèri



e VSG Bangg

Bis jetzt hänn mini Möbel tolli Nämè träit
Ha dene «Billy», «Torkel» oder «Ingvar» gsäit
Jetzt hän «d'Estricher» dr Pfischer ybernoo
Scho sehsch dert e Schrangg namens «Adolf» stoh

Im historische Museum täte Sache verschwinde
Au sueche nützi nyt, me könnns nimmi finde
Do han ich an mini Altì dänggt
Und hanere e Museums-ltritt gschänggt

Im Groosroot gitt d'Frau Knellwolf e Vorstoss ii
Will sovil baue wird, setti drämlifahre gratis sii
Der Vorstoss lychtet uns Blagèèri ii
Wenn jo kai Drämli fahrt kas gärn gratis sii

Dr Shakiri, das Bonsai-Kraftpaket
Hett Angscht im hoche Gras, dass me ihn nimmi seht
Für dass en d'Mitspiler doch kenne finde
Will är ums Veregge die Käpten Binde

Die Greta steert, das isch nit fair
Mit ihre Demos unsre Stossverkehr
Vo däre hätte me nie nyt gheert
Hätt me dr Verkehr vo ihre Eltere gsteert

Uff däm Helge kasch es see
Dä Öpfel stoht für d SVP
D'Ussag die isch kurz und knapp
Uss däm fule Öpfel haue sogar d Made ab

Ich ha, do bini putzt und gstrählt
D Arslan und dr Atici noch Bärn uffè gwählt
Ich ha si, das muesch au verstoh
Beidi lieber dert als do

Die letschte Wahle sinn wärtvoll – pedagogisch
Dä Grienrutsch zeigts doch völlig logisch
Ganz viel Griens uf me Huffe isch bigoscht
Simpel, eifach nur Komposcht

Ob Trump, ob Merkel, Zürcher oder Schwoobe
Ob Pabst oder Drämmli puff jede Oobe
S' gitt druss kai Bangg mit Pfiff und Witz
Drum liebe Wessels blib no e bitz

Ich gang uff Weil go Klopapier poste
Wil Schissirulle dert weniger koschte
Jetzt stand i imme Lastevelostau
Und dahei uff em WC wartet mini Frau

Falschi Polizischte wo im Baselbiet umme schliche
Ergaunerend Stutz vo Alte und Riche
Die Schugger sind ächt si sind am Gäld zämme spare
Au uff em Land mechte Polizischte au TESLA fahre

Artgrächti Haltig sells im Zolli gee
Drum kasch dert kaini Wölf und Bäre me see
Näggschtens hetts in de Gheeg kaini Affe
Dert kennt me güschtige Wohnrum schaffe

Wottsch au by uns bänggle?
Uff www.vsg-basel.ch erfahrsch meh!



Fasnacht 2020



Die alte Määrli stäärbe uss, das isch doch wiirgglig schlimm
Kaini schöne Gschichtli mee vo de Brüeder Grimm
Käi Rumpelstilz, käi gschifflete Kaater wo duet umme schwänzle
Käi Hänsel und käi Gretel mee, hütt duet s Greta nur no hänsle

Dr alti Baapscht dä jöömerlet, die Bischhöf sind scho Affe
Jetz bin i 92 worde, s Zölibaat wänn die aabschaffe
Dr jung Baapscht maint, wott di äini wärs e riise Hit
Nuur haa i Angscht, das es für di z weenig Viagra git

D'Migros Klubschuel bietet jetzt, e Kurs speziell für d'Frau
Do gohts ums Fuessball-Reegelwäärgg, das intressiert mi au
Nur muess uns Fraue dängg i mir, das niemerts lehre welle
Für uns isch das doch kai Problem e Maa ins Absits z'stelle

Schalts Liecht i du Pfiife, polteret dr Dani vo Wattewyl
Wellofaare ohni Liecht das isch iim äifach z viil
Für uff d Strooss, gits doch Reegle au für die wo's Liechtli brennt
Nur kenn ich käi Wellofaarer wo die Reegle kennt

Mii Maa dä hett baar Kilo z'viil und das duet är beduure
Drum goot är jetzt in Yogakuurs und iebt döört die Figure
Dr Schmäterling, dr naggti Aff und s Söili kuugelrund
Denn kunnt är hai, erschöpft vom Kuurs, und macht dr fuuli Hund

S git Grippe Vire, Näärve Vire, Corona noischtens au
Waansinn gits verschideeni, vom Rind und vo dr Sau
Denn gits e Waansinn dä isch schlimm, das duet au kein beschritte
Es isch dr Waansinn wo phersöönlig dr Donald Trump duet ritte

E Banaane glääbt am Kuchichäschtli, so muess me das hütt mache
Mii Ma gseht das und mäiint sofort; Bisch du denn nit ganz bache
Nimm weenigschtens, grad alli Frücht soo wärs denn eebe rächt
Nuur zämmegschnitte, haa i gmeerggt mit Fruchtsalat goots schlächt

Chummi i spoot vom schaffe häi zu miim liebe Schatz
Stoot im Wääg e Suppedopf, zem lauffe hets käi Blatz
Stellt är dr Dopf, uff die Stääge wie isch dä unterwäggs
Doo maint är drogge, du hesch gsaait; stell dr Dopf uff d'Stueffe Säggs

Dr Harry und s Megan verabschiide sich und das zimlig fiin
Sii schriibe iiri Kündigung und schigge die dr Queen
Die isch ab däm «not amüsiert» zieht e schreegi Schnuure
Jetz haa i mi Bewäärbig gschiggt, vilicht gang i als Prinzässin duure

Wotsch au by uns bänggle?
Uff www.vsg-basel.ch erfahrsch meh!



Fasnacht 2020

D'Schnaps bagge

Ych glaub fescht draa und bätt jede Oobe zue dr hailige Verena
Hoffentlig haisst d'Joggelihalle glyy «Roger Federer Arena»
Und dass die, wo jetzt no drgeege sind, sich au derzue bekenne
kennt me der Schissiberyych jo «Hanspeter Wessels-Bödeli» nenne.

Hyttzuetags isch's nit genial, s'isch normal; me goht digital oder viral,
es isch fatal, me git sich mental global, aber lokal frisst me total halal
Me dänggt nimm banal, nai monumental, diagonal oder diametral
wär au optional. Drum sag y brutal und radikal nimm: «Lägg mer am...
sondern: Du kasch mir anal.»

Y bi letschthi in e Sutter Begg,
voller Vorfreud uff e feyns Znüni in mim Härz,
«Gänd's mer e Maitlibai», han y g'fleetet, «das vertrybt dr Seeleschmärz.»
«Es haisst nimm Maitlibai sondern Gliggsbringer, guete Maa»
tuet d'Backerzyygnis-Verkaufsberootere kraye,
do sag ych: «Wenn das so isch, gueti Frau,
denn nimm y e alti Zwätschgewaie».

Kolibagterie im Tringgwasser z'Lieschtel –
und nit Ain vo däne Rampasse hett's g'lüpft,
wo si das in dr Stadt vernoo hän, hett se das ziemlich düpft.
Jetzt ka me z'Basel uffheere mit jommere und fordere,
denn me waiss schlussamänt:
Im Baselbiet isch me gege Schissdrägg resischtänt.

Im Hallwilersee hett me e Kaiman gsichtet
– letschte Summer – d'Mediewält hett bebt
Schynt's hän Lyt denn z'erscht dr Hund ins Wasser g'loh,
zem luege, öb's verhebt.
Es isch scho ungläublig, wie Anderi dängge,
wie das bi däne do oobe tigg,
Ych hätt als erscht's halt d'Schwiegermueter yynegschiggt.

Die Brennstäb vom AKW Mühlebärg bruuche zem abkiehle zwai Joor,
denn simmer putzt und gschrählt und es bestoht kai Gfoor.
Das dunggt mi e weneli lang und es zaigt mir: «Ych wird alt»,
denn min Frau sait, mi Brennstab sig scho noch ere Minute kalt.

Dr Roger Federer zieht mit sinere ganze Corona no Rapperswil-Jona
Au si Putzfrau Ramona, us Pamplona, tuet bi ihm wohna.
Är hätt au kenne z'Ascona wohna, z'Verona oder z'Barcelona.
Lueg däm sy Lohn aa, dä verdient Milliona, aber goht's ums wohna,
git bim Roger d'Frau dr Ton aa.»

Dr Prinz Harry und sini Meghan wän vom änglische Hof ewägg,
die royali Tradition kümmeret die Zwai e fiechte Drägg.
S'glyyche hett dr Charles in junge Joore au scho emoll welle woge,
aber denn hett ihm d'Queen sini Leffel uff die hyttigi Längi zooge.

An däm Fraustreikdaag han y undeduure miesse, das ka ych euch sage,
me hett mi demietigt und aabegmacht, s'ligt mir hytt no uff em Mage.
Me hett mi ussgnützt und schigganiert, y bi nit g'schaffe fir settigi Sache,
sälle Morge han ych dr Kaffi sälber miesse mache.

Wotsch au by uns bänggle?
Uff www.vsg-basel.ch erfahrsch meh!



Fasnacht 2020



dr Hampe vo Kleihünige

Im Fall...

... do motz i, schimpf i, schrei i, flenn i, rüef i us und fluech i
Vom Dreischpitz bis ans Eglisee uff dr Parkplatzsuechi
Do findi ein, legal, do droht mr nit e mol e Buess
Doch woni wött parkiere, mergg i: Shit, ich bi jo z Fuess

... mi liebi Frau, die teschtet neuerdings bi mir mi Treui
Si postet mir als «Uschi» heissi Tweeds, si sei die Neu
Natürlig gib ich Antwort, so vil Aaschtand find ich wichtig
Und jetz isch mini Alti uff sich sälber iifersüchtig

... e Lädeli und näbedra e Schtroossebeiz mit Flair
Zwölf Bänggli zum Verwiile und e Shop und e Coiffeur
E Boutique und zäh Bäum, was zwüschenin drei Schpünte git
Do wüsse mir schpontan: d Freie Schtrooss ischs sicher nit

... jetz gits e Bar in Basel, do zahlsch an dr Bar nümme bar
Zahlsch nur no mit Karte, bargäldlos, das isch jo klar
Ob Bargäld oder bargäldlos, was juggd mi das scho gross
Ich bi noch jedem Barbsuech sowiso mi Bargäld los

... mir hän e neu Wohnig gfunde, ich und mini Frau
D Ruum sin glei und dunggel, d Kuchiwand sin schimmelgrau
D Mieti isch sautüür und d Nochber göhnis voll uff d Niere
Dasch egal, mir könne gratis vor em Huus parkiere

... ich ha e neu Fründin, e Lehrerin us Lause
Ich ha si gfrögt, was hesch am liebschte, und do seit si: Pause

... du sehsch mi zahle, zahle, zahle, zahle ohni Änd
Ich zahl und zahl und zahl und zahl sit Johre Alimänt
Ich bi e tolle Babbe für mi Nochkomme-Sextett
Hejo, ha gluegt, ass jedes Kind si eige Mamme het

... ich dängg no vil an FCB. I dängg au an si Trainer
Und s wunderschöne Fuessballmärl, das wird als wie schöner
Dä Super-Trainer, isch für s Team die beschti Medizin
Drum freu mi über jede Siig vo Union Berlin

... s isch super, ich ha ghört, mir heige ändlig gnüegend Gäld
Zum alli grosse Schwirrigkeite z löse uff dr Wält
Ab hüt isch Schluss mit Hunger, Not und Krieg an alle Fronte
S Gäld isch do (s ligt eifach nur no uff de falsche Konte)

... i fahr nit z Bärg, ich mues mi nit uf Alpegißel wuchte
Es gheie jo bim Klättere scho gnueng bärgab in d Schluchte
Ich bi nit gmacht für d Alpewält, do miecht ich numme schlapp
I schtürz jo scho bim Schpalebärg regelmässig ab

... ich ha e neu Fründin, s isch d Svenja vo Zwinge
Und liideschaftlig ghörsch si schtundelang und täglich singe
Und wenn si singt, do sehsch mi dusse uff em Balkon schtoh
I will jo schliesslig nit, ass eine meint, ich wurd se schloo

... sgit Lüt, die läbe läbenslänglich ohni Alkohol
Die hän denn ohni Kohl so quasi sälte ein im Gool
Doch ohni Alkohol, jo schriibet euch das hinter d Ohre
Wär e Teil vo euch do inne gar nit erscht gebore

Wottsch au by uns bänggle?
Uff www.vsg-basel.ch erfahrsch meh!



Fasnacht 2020



80 Myloone Köpfgäld gitts – für e Trump – das isch zimlig Koole
Mit folgender Ydee – wänn mir das Gäld – für uns yyne hoole
Mir laade in – uff e Sprützfaart yi – im Kennedy sim Kaare
Und düen mit ihm – im Cabriolet – e bitz durch Dallas faare

E Kynees hett kai gääli Hut – will das gar nid goot
D'Greta isch jo au nid Grien – und e Indianer gar nid Rot
Nur aine aber – isch wiirgglig farbig – dä isch jo nid ganz dicht
Dr Donald Trump – es isch eso – isch dörangsch im ganze Gesicht

Fiinstaub, e bitz Asbescht und e Schläggli Alkohol
E Stüggli Arsen – kli Schwärmetall – und e Zigaretli mit Benzol
Dä Kräbs hett das – alles gfrässe – und lauft jetz so durch d'Geegend
Ganz offesichtlich – isch das Züggs – alles Kräbserregend

Dr Harry und d'Meghan hän Queen endtüscht – im Palascht het sy luthals gwätteret
Vor Wuet het sy ihres Gucci-Däschli – voll uff e Bode gschmätteret
Bi dr Ussprooch – isch es eskaliert – sy het dr Meghan ains wölle wüschte
Zum Glügg isch dr Charles als Schutzschild grad – mit sine Ööre
drzwüschte

Mi Frau will nur no klimaneutral – Co² Schleudere mien wiche
Sogar dr Komposcht im Garte mues wäg – dä broduziert drum s'gliche
Jetz macht sy us – Sellerischale, brune Banane und verdörte Lillie
Eigentlich no – feini Smoothies – für die ganz Familie

Min'ere Frau han i gsait – «due sofort s'Shampoo im Bad wägruume»
Denn uff däm Fläschli stoot klar druff: s'gitt Fülle und macht Volume
Si badet jetz – im Gschirrspülmittel – so wie ich das wett
Denn dört stoot druff: «Entfänt fascht alles – au hartnäggs Fett»

Die Zuenahm von däm Coronavirus – das ka aim Sorge mache
Mir hän drum jetz dr Käller gfüllt – mit Konsärve und so Sache
Aber öbbis macht – uns viel mee Angscht – me miesst uffzieh harti Saite
Hän si scho mol gmerggt wie sich – die Zürcher dien verbreite

Die E-Bikes fräase wie die irre – mit Volt und mit Watt
Mit E-Trottis dr Spaalebärg durab – die finde das wohl glatt
Wotsch aber mol – e richtig Kick – denn verloss unseri schöni Stadt
Und faarsch im Gäldtransporter quer – durch dr Kanton Waadt

Dr Dani vo Wattenwyl – isch denn scho e wiffe
Sait zu däne Velofahrer – «schalts Liecht y du Pfyffe!»
Nach 40 lange Ehejoor – kenn ich's anderscht – das muesch begriffe
Mini sait – «Schalts Liecht ab – sunscht seh ich no di Pfyffe!»

D'Angi Merkel isch z'Paris – d'Notre Dame go bsueche
Und het denn e Rundgang mit em Glöggner wölle bueche
Bim Rundgang het sie afo zittere – bim Versuech e Kerze azünde
Em Macron het sie denne gsait...

Ich hab ein Streichholz angezündet und ne Flamme hat's gegeben
und ich wollte für das Kerzli Feuer von dem Hölzli nehmen
aber s'Hölzli ist davongespickt und ich bin nachgerannt
gefunden hab ich's nicht – und dann hat die Kirche gebrannt

Wotsch au by uns bänggle?
Uff www.vsg-basel.ch erfahrsch meh!



Fasnacht 2020

Dr Baschi Dürr tuet jetz sy Zuekunft reorganisiere
är well jo nit s'ganz Läbe lang doo z'Basel regiere
in ere Färnsee-Serie, in ainere vo däne viile
könnt är in «Two and a half Men», denn dr half Men spiile

Ych läb nit ganz Fleischfrey und au nit Lägerlifrey
y läb nit ganz Alkoholfrey und au nit Glutfrey
y läb nit Zugerfrey und nit Laggoosefrey
und y läb nit Kaffi-Frey und scho gar nit Chocolat-Frey

Will y emol uff's Drämmli, nämme mer mol a uffs Nummere Ains
no hani Päch, denn wägere Demo kunnt denn halt kains
und wägere Baustell kunnt kai 6er und kai 8er no hani's lo blybe
und bi verruggt denn halt wieder heim dä Vårs do go schrybe

A propos Drämmli im 10er ganz vorn
winggt mr dr Ärscht Born
und im 2er seh'n y s'Miggeli Meyer und im 8er bi dr Dür
griesst mi dr Baschi Dürr
uff dr Linie 1 seh'n'y dr Studer Heinz und im 6er s'Susi Lämmli
fir was bruch ych no s'Facebook y triff jo alli im Drämmli.

Ich habe gern die Roten und ich die Gelben
ich möchte die Orangen und ich nimm dieselben
ich liebe dich, wollen wir heiraten, in der Tüte? Ohjee
Dasch e Usschnitt gsi vonere Kadersitzig bi dr BVB

Sit 60 Joor gitt's jetz dr Bligg, dasch scho lang
350 Joor fyirt s'Waisehuus, dasch au scho lang
tausig Joor alt isch s'Minschter, dasch ewig lang
und 10 Joor z'lang sait dr Stau-Hampe ändlig y gang!

Jetz hänn's bim Waggsfigure-Kabinett au no welle
e Waggsfigur vo dr Greta Thunberg härstelle
no hett ain gsait, Das goht nit, Das sey absurd
Die sey soo klimaerwärmt, ass s'Waggs grad wieder schmelze wurd

S'gitt E-Auti, E-Bike und die E-Trotti sinn jetz dr Kracher
s'gitt sogar E-Fuessgänger, die mit eme Härzschriftmacher
aber ai Erfindig gitt's nonig, die fänd y aber guet
e E-Portmonnai wo sich dr Inhalt wieder uflade duet


Me sait schyns nimm Maitlibai und au Schänggeli kasch vergässe
e Sutter Begg-Furz, wenigstens darf me se bis jetz no ässe
au Schwebli und dr Schnäg sei frauefindlig, haiss'ts efang
Jetz muess mi dängg no schämme, wenn y am Sunntig
an Frieh-Schoppe gang

www.bäffzgi.ch

Wottsch au by uns bänggle?
Uff www.vsg-basel.ch erfahrsch meh!



Fasnacht 2020



Nachtschwärmer

Uf Widerluge, scheene Oobe, Euch alle
Mir hoffe, es het Euch mit uns gfalle
Drotzdäm blyybe mir no doo
Bim Brexit lauft's genau esoo

Mi Alti het mis Rauche ghasst
Und het mi als zem Huus us gschasst
Mit Dampfe han i's hit scho liechter
Darf dinne blyybe, als Luftbefechter

E Grieni het welle in Bundesroot
Mir händ scho dänggt, ass das nid goot
Und wie die Griene als so dien
Wär's statt Bundesroot jetz Bundesgrien

Syt 20 Joor, s'isch wunderbaar
Sind mi Schatz und ich es Paar
Syt eme Joor isch es aifach Scheisse
Muess mi Liebschti verglemmi Greta haisse

Dangg CO2 het's Bier scheen Schuum
Will ooni Schuum suffsch es kuum
Suff i z'vyyl Bier, und ha n'e Flaade
Han i deheim mi aige Klima-Schaade

Tierschützer proteschiere, Joor fir Joor
Fir e Fasnacht ooni Tier, wäg dr Verletzigsfoor
E Stigg wit gib i iine rächt
E Fasnacht ooni Kater wär nid schlächt

I has s'Drämlli-Museum bsuecht
Und nach eme beschtimmte Drämlli gsuecht
Uf das han i gwaartet, jeedes Mool
So gseen'i das Drämli au emool

Mir goot's nid guet, ganz im Vertraue
Kirzlig isch mi Schatz abghaue
Mir goots no schlächter, das isch esoo
Kirzlig isch mini Alti retour koo

Mir händ d'Martullo-Blocher droffe
Mit iire ai Bier am andere gsoffe
Nach 5 Bier hämmer afoo lalle
Nach 10 Bier het si uns afoo gfalle

Im Chineese Reschtaurant hämmer's gsellig
Und mache bim Fröilein unseri Bschtellig
Dernoo wäärde mir vor d'Diire gschtellt
Mir händ drey Fläsche Corona bschtellt

Wottsch au by uns bänggle?
Uff www.vsg-basel.ch erfahrsch meh!



s'KällerDiirli

E VSG-Bangg

Mi Lehrling het sich daas Joor welle im Süüde in d'Sunne leege.
Us däm Grund, duen ich hüt bi euch mi Ständer sälber heebe.
Falls du do vorne, jetz s'lätze dänggsch, denn will di aber frooge.
Warum starrsch mir ständig druff, mini Auge sin doo oobe.

Z'Australie han ich e Koala-Bäär us em Buschfiir boorge.
Dr Basler Zolli het ihn nid welle, är miechi ihne nur Soorge.
Dä schloofi zwanzig Stund am Daag, isch fuul und völlig druff.
Jetzt hannen im Roothuus unterbrocht, deert fallt är nid groos uff.

Wenni scho grad im Zolli bii, denn mags villicht no glinge
Und ha probiert, em Gorilla deert Zaichesprooch biizbringe.
Dä luegt nur blööd us sinere Wösch, wiene dümmlichs Reeh
Do maint är: «Ich bi dänn im Fall kän Aff, ich chume vom Zürisee.»

Em Emboloo hän sie dr Lappe gnoo, jä Syy, das kunnt drvoo.
Fahrsch iiberem Nivoo, denn wirsch drnoo, vo de Schugger uusegnoo.
Fahrt dr Wessels drvoo, uf sym Veloo, denn sait dr Schugger «hejoo:
Ich loss di goo, bis nirgendwoo und mir sin alli frooh.»

Dää Fraustraik letschte Juni, ich hätt ihn fascht vergässe.
In Sinn koo ischer mir denn widr, won-ych im Draam bi gsässe.
Uffem Wääg zer Aarbet, numme Männer und das kunnt drzue:
Ich haa e Sitzblatz kenne wääle und gheerscht het himmlischi Rueh.

Dr Hueber bietet em Kemifääger im Draam sii Sitzblatz aa.
«Ich gsee am Ruess, Syy hänn hyt gschaftt und sin e flissige Maa.»
Dr Ruess, maint däa, käm nid vom schaffe, falls ihn das intressiert.
Si Fiirrobepier im schwarze Bäär sigg e weneli eskaliert.

liber d'Basler Reegierig e Väarsli brinze, do muesch di nid verrisse.
Bi dr Ackermaa längt brinze nimm, do muesch s'Väarsli eher schisse.
Fiir e Baschi längt e fiechte Fuurz, es loont sich gar nimm z'motze.
E baar dausig Stimme fir dr Erich Wääber, dasch denn nur zem kotze.

D Flieger vo dr Patrouille Suisse hän s'lätze Dorf aagflooge.
Schiins hets se denn au no grad in e bööses Luftloch zooge.
So Turbulänze z'Mümliswil sin normaal am Himmelszält.
Eh, loogisch het das deert e Loch, das isch dr Arsch vo dr Wält

Es war einmal e junge Prinz und syy Frau us libersee...
Dänne gfallis nimm im Schloss, drum häns si's langsam gsee.
Jetzt isch ganz Ängland grausam muff, die hän das nid vertrait,
dass deert ebber doch no weiss, wie me Aadie sait.

Am Gliimagipfel isch dr Doonald bletzligg stargg am schmolle.
Näaben ihm schtschtoots Greti grimmig und duet mit de Auge rolle.
Und däa do ääne mit blauem Aug, dr Trump het wäg ihm kocht.
Dä haig ihm drumm für e Zytvertrieb e Schweederätsel broocht.

Mi Kolleg us China, dr Luong Bling Bing, liggt sit gescht im Spittel,
Es gääch ihm aber scho widr guet, sait mir sone wysse Kittel.
Wonni dr Luong due bsueche am Granggebett, do het är mir verrätscht.
Wonner dr Muurer ghöört het änglisch reede, haigs ihn vor Lache
fasch verdätscht.

S'Funicello isch im Bundeshuus, gratuliert han ich ganz nätt.
Sie het sich gfreut, ich haigg bi ihre jetzt e Stai im Brätt.
Die Redensart passt no guet, worum sag ich euch gschwind:
Wotsch e Stai in Brätt go stegge, sie häts grad vorem Grind.

Wotsch au by uns bänggle?
Uff www.vsg-basel.ch erfahrsch meh!

